



**Inatsisartut aalajangiiffigisassaattut siunnersuut, Naalakkersuisut peqquneqassasut naalagaaffiup avataani Kalaallit Nunaata sinniisoqarfiinut aningaasartuutit nalilersoqqullugit. Nalilersuineq Inatsisartunut UPA2024 ingerlanerani agguanneqassaaq**  
(Inatsisartunut ilaasortaq Jens-Frederik Nielsen, Demokraatit)  
(Siullermeerneqarnera)

Qujanaq Demokraatit Inatsisartuni ilaasortaatitaannut Jens-Frederik Nielsen siunnersuuteqarneranut, annertuumik pilersarusiornikkut nunanilu tamalaani politikikkut pisunut inissisimanitsinni. Taamatuttaarlu nunani allani niueqatinut aningaasatigut iluaqutaasussamik kissaateqarnermut.

Nunatta nunani tamalaani politikikkut pisunut inissisimanagera immikkuullarissuuvoq Issittumi aammalu nunarsuarmut tamarmut. Danmarkip Kunngaqarfianut atanitsinni uagut Kalaallit Nunaanni killilimmik nammineq naalakkersuisoqarpugut, taassumali pilersarusiornermut isumaa annertusimavoq Issittumut soqutiginninnerup annertusisimanagera pissutigalugu naalagaaffinniit aammalu suliffeqarfinniit.

Isumannaassuserput nikerarsinnaavoq arlalinnik pissuteqartumik. Maani nunatsinni politikikkut inissisimanagerput nunanilu allani pissaanilissuarnut attuumassuteqarnerput isumannaassusitsinnut sunniteqarsinnaavoq. Taakku saniatigut silaannaap allanngoriartorneranit unammilligassat, avatangiisit pillugit ernummateqarnerit Issittumilu killeqarfilleqqusaannerup isumannaassuseq patajaassuserlu sunnersinnaavaat.

Kalaallit Nunaata tungaaniit nunani allani sinniisoqarfinnik pilersitsigaangatta, pingartuuvoq eqqarsaasersuutigissallugu nunani tamalaani politikikkut pisut isumannaassusittalu ajorseriataarsinnaanera tassani pineqarpoq politikikkut patajaassuseq, avatangiisit aammalu killeqarfitsinni innarligassaangissutsitta siorasaarneqarsinnaanera. Taakku pissutsit sukumiisumik misissoqqissaarnerisa nunani allani akuusinnaanitsinnut nalunaarutigineqartussamik isummernissamut ikiorsersinnaavaatigut.

Nunani allani sinniisoqarfeqarnek liberaalit isiginnittaasaat malillugu arlalinnik pitsaaquteqarlunilu ajoqutitaqarpoq. Pitsaaqutaanut ilaavoq nunani tamani pisisartunut tikikkuminartuunerup annertunerulernera, nunarsuarmi tamarmi attaveqaatinik suleqatissanillu inerisaasinnaaneq aammalu Kalaallit Nunaata nunarsuarmi tamarmi akuusutut isigineqarnerata annertusarneranut. Ajoqutaasunut ilaasinnaapput sinniisoqarfiit pigiinnarnerisigut aningaasat qaffassinnaaneri, kulturikkut paatsooqatigeeriataarsinnaaneq imaluunniit politikikkut aaqqiagiinginnerit pilersinnaaneri imaluunniit nunami sinniisoqarfiusuni niuernikkut naalleraanerit. Ataatsimut isigalugu nunani allani sinniisoqarnermut ammasumik isiginnineq ineriartornermik neqerooruteqarnermik periarfissiisinnaavoq, kisiannili sukumiisumik pilersarusiornissamik upalungaarsimanermillu piumasaqaatitaqarluni.



Nunani allani sinniisoqarnermut aningaasartuutit nikerarsinnaapput pissutsit assigiingitsut pissutaallutik soorlu sinniisoqarnermi inissisimaneq, annertussuseq siunertarlu. Aningaasartuutitut nalinginnaagajupput ininik attartorneq, sulisunut akissarsiat, angalanernut aningaasartuutit, ussassaarinerit, akileraarutit pisinnaatitsissutillu, sillimmasiinerit aammalu allaffissornermut aningaasartuutit. Aamma aningaasartuuteqarsinnaavoq piffinni inatsisit malittarisassallu tulluussarnerinut aammattaarlu ilimaginngisaraluanik aningaasartuuteqartoqarsinnaalluni aningaasat naliisa allanngornerisigut imaluunniit nunami sinniisoqarfiusumi politikkikkut allanngortoqarneratigut. Uagutsinnut pingaartuuvoq, aningaasartuutit taakku sukumiisumik nalilersornissaat aammalu sukumiisumik inuiaqatigiinni aningaasarsiornikkut kingunerisassaasa naatsorsornissaat, nunani allani sinniisoqarfinnik pilersitsinnginnitsinni. Taamaattumik pissusissamisoorpoq, taakkunani sinniisoqarfinni ammasumik isertuannngitsumillu ingerlatsisoqarnissaa, soorlu siunnersuuteqartup kissaatigisaatut paasigipput.

Nunani allani sinniisoqarfinnik pilersitsinermut atasumik inuiaqatigiinni aningaasarsiornikkut kingunerisassaasa naatsorsunngitsoorneratigut uagutsinnut Kalaallit Nunaanni arlalitsigut ajortumik kinguneqariaannaavoq. Aningaasartuutit pitsaaqutigisinnaasaallu peqqissaartumik nalilersorsimatinnagit aningaasatigut annaasaqaatigisinnaavarput, inernerit naatsorsuutigisimasaraluagut angunngitsoorlugit imaluunniit nunani allani sinniisoqarnek pigiinnarsinnaajunnaarlugu. Missingersuut qaangerneqariaannaavoq, taamaalillunilu aningaasatigut aalaakkaasumik ingerlanerput annertusiartornissamullu periarfissat sunnersinnaallugit.

Aammattaaq inuiaqatigiinni aningaasarsiornikkut kingunerisassaasa naatsorsunngitsoorneratigut paasisaarluannginnermik kinguneqarsinnaavoq, kulturikkut assigiingissutsinik imaluunniit inatsiseqarnikkut piumasaqaateqarnernik, niuernerimik ajalusoornermik kinguneqarsinnaalluni imaluunniit ima ingasatsigaluni inatsisitigut kinguneqartinneqarsinnaalluni. Aamma upperineqarnerput imaluunniit tusaamaneqarnerput annaasinnaavarput, nioqqutissat imaluunniit kiffartuussinerit nunap pineqartup niuerfiannut naatsorsuutigineqartutut tunniussinnaanngikkutsigit.

Naatsumik oqaatigalugu inuiaqatigiinni aningaasarsiornikkut kingunerisassaasa naatsorsunngitsoornerisigut aningaasatigut annaasaqaatigisinnaavarput, iliuusissanut unamminartoqartitsineq aammalu nunatta isigineqarneranut innarliisinnaalluni, taakkulu erseqqissarpaat qanoq pingaaruteqartigisoq nunani allani sinniisoqarfinnik pilersitsisoqannginnerani sukumiisumik nalilersueqqaartoqartarnissaa.

Taamatut oqaaseqarluta, siunnersuuteqartup uuminnga isummerfigisassatut siunnersuuteqarnermini siunertai, tamakkiisumik taperserpagut, itisiliisoqarnissaalu paasiuminernerulernissaanik siunertaqartoq atorfissaqartinneqassappat, taamaaliussaagut aappassaaneerineqannginnerani ataatsimiitaliami suliarineqarnissaa sioqqullugu.